

四庫全書

集部

欽定四庫全書

文苑英華卷五百四十七 宋 李昉等 編

鳥獸門二十四道

屠龍判一道 射牛判一道

驅犢蹊園判一道 殺牛判一道

爲父殺牛判一道 不埋狗判一道

射猿判一道 死官鵝判一道

斷屠月殺鷺判一道 養賈兒判一道

爲若族判一道

殺鳥獸判一道

解牛鳴判一道

解鵲語判一道

神爲異聲判一道

弓矢驅鳥爲判一道

蕃客求魚判一道

獻千歲龜判一道

宴客鼈小判一道

養鷄猪判一道

父病殺牛判一道

狗傷人有牌判一道

牛舐馬判一道

解牛鳴判一道

前有此判題各

對

屠龍判

丁以屠龍爲業乙告不經

對

鱗族惟錯實繁有徒人不知非龍實有智風雲遇坎見  
困豫且變化逢屯充膳夏后丁以詭俗爲事遊刃非物  
或異仁賢罔識悔吝何則犬不言殺前哲良規馬重有  
功後代明訓况四靈之貴萬化之資匪惟瑞啟漢年罔  
以仙登軒帝以屠爲稱豈不作法於涼以律繩之可謂

自貽伊感

射牛判

萬年縣申王祚告侯明射牛明疑狼入圈中蓄牛將弓射狼誤中牛事

對

三元赫赫牛星紀於北方八極悠悠牛山建於東國錢塘水上遠浮金鎖之輝蜀郡江前遙沉石犀之影豈止披蹄載角玉鞅華鞞南州聞果下之名西域表花津之

異固以禮標極敬大祀資於潔圭易贊神明引重憑於  
致遠由是降茲綸綍著彼科條姜牙絕其鼓刀庖丁息  
其游刃侯明鄉閭賤品稼穡庸夫常傳寧戚之經久習  
高堂之法西河資產希十千而萬計東州奔駿方一日  
而千里俄而野心興暴縱目爲災引駢角之雕弓控青  
筌之箭羽異天弧之垂象空法向狼之星殊封禪之舊  
章便爲射牛之事悞殺不禁著自彝章罪疑從輕聞諸

古實

驅犢蹊園判

乙驅犢蹊丑園丑怒留其犢乙訴強劫

對

人守堅貞克終無替苟失廉節其弊斯生乙棲心丘園  
私志閒雅忘負鼎之事從叩角之遊徘徊泉石躑躅林  
草雅志情遠防微理乖事須正子夏之冠避朱仲之李  
豈得牽壽春之犢踐於陵之園人而失園一至於此丑  
也奚據罰彼何深所損既在於場苗取酬便過於佩犢

叔時作喻蹊田罪輕丘明述事奪牛刑重前文已決後見須依

殺牛判

丙告丁殺牛事丁別款丙鑄錢州斷盡處極刑使出從徒

對

議獄緩死先典攸慎聽言觀色法貴詳平刑罰暫虧手足無措眷彼丁矣有異里仁見蒲葉之生春無聞曳耒



入桃林之鉅野爰事鼓刀遂令河渚風秋奄沉星彩蜀  
山路險不見金生丙匪良交遂來相訴芳蘭入詠遽展  
契於風雲叢棘議刑幾窮詞於刀筆搖尾求食斯之謂  
乎朝歌殺牛理非謬矣方引循環之辨翻露鑄錢之責  
緬監厥跡奚其若斯未盡金潭之由更起淮陽之獄州  
司振藻處以極刑使者彈毫將爲徒坐諒哀矜而勿喜  
何輕重其若斯狀外不推使司得其折衷案中論死州  
法酷其深文結以徒刑吾無間矣

爲父殺牛判

韓孝隨父行牛驚舐人恐損父遂以刀殺牛牛主論告  
孝請價陪填事

對

天經地義道冠生靈立身揚名德光終始見危授命宣  
尼以爲美談臨難捐軀馬遷述其遺烈韓孝不忝人子  
先隨父行逢瑩角之初驚以衝燕壘遇奔蹄之暫躍若  
走秦郊蒼黃貽性之憂倏忽慮庖之患霜鋒一舉若庖

丁之刃游冰錐聊揮似宰夫之斷割原始雖稱犯罪要  
終未可論辜既符名教之規還申壯勇之節酬價匪虧  
公理與直有愜私家庶叶平反之詞以表從輕之典

不埋狗判

城外多死狗法司責京兆府不埋訴非掩骼時

對

惟犬守禦居人是要混鷄而入坐識於新豐伴鷹而遊  
行傳於上蔡是故閭閻密邇音響相聞喧雀成譁表貧

吏之節噬腓起戒陳爲主之誠何畜養之是均而城外  
之多死知殃預兆未銜吳相之衣遘斃遠深爲食驪姬  
之藥流穢行路彰聞法司舉過從愆事闕京兆且弊帷  
從棄孔丘之義有虧掩骼候時周公之禮可守二途交  
戰須定是非執禮而行斯亦爲得

射猿判

戊至丙乘舟來峽射猿中之黜其職丙不伏

對

沉沉長江巖巖峻峽波瀾浴日嶺嶂橫雲路出東吳卽  
是三聲之地途危西蜀還尋萬里之橋顧維彼丙在茲  
于役乘流振楫方從赤馬之遊滿月彎弧遂落玄猿之  
影雖同養由之妙終致桓公之黥於人則事乖親愛在  
獸則理切肝腸彼或可傷此可辭黥

死官鵝判

乙養官鵝多死或告不以人養鳥

對

池籟大開羽族無筭乙忝夷隸職養官鵝諒須盡心能  
識其性稻梁可遇蔓藻堪遊浮積水而連羣向長風而  
鼓翅一作遂其棲托終冀繁多倦鸚鵡以樊籠樂鷄鷓  
以鍾鼓以人養鳥不死胡爲儻或類茲如何免責且片  
言折獄自古攸難理宜再詰是非不可輕爲與奪

斷屠月殺鷺判

甲爲蒞菽飼鳥子致死鄰人告斷屠月殺鷺子

對

丁家巢泥載聞於頭禿黃氏把火旋見於眼傷甲之無  
良情則非善以蒺藜而充飼三子俱亡無桃李之垂陰  
一朝被告迹符周氏罪挂湯羅循情合科準狀難捨

養賈兒判

丁養賈兒能馴擾啄人穀不伏陪

對

丁爲拙好收養賈兒日月淹延羽毛成就逢人不懼遇  
物無驚有鴨羣之精神得鶩斯之風彩楚鳥一作鳥既非

別族吳鷓亦是一宗未能甘鼠已聞啄穀鳥未損物人  
則何辜即索陪填恐非通允丁稱不伏理亦無乖

爲砮族判

甲爲砮族以十日號覆鳥巢

對

順時之令則無覆巢作災之禽固資書版陳之禮典布  
以人倫苟或在辰克用茲道是以有鷓萃止爰結興於  
詩人見彈而求乃寓言於莊叟長沙天性入室貽凶曲



阜陳誠毀巢標喻若族氏職惟斯掌務乃昭明有均大  
羅之躅是忝虞人之効將去妖鳥式徇其義

一作既均

惡聲庶無全卯日號月號之法書而不憊從子從角之  
規用則斯備周典非昧方書是懸均射隼於高墉豈巢鷲  
於外戶將使驚鳴緒聞同反舌之無聲聯翩影搖隨退  
鷁之不駐事非詭妄告實欺誣諒稽十日之號難寘三  
章之典

殺鳥獸判

今有過而殺傷鳥獸者甲以人成之

對

大羅以往禮猶因襲豸龍斯廢法亦罕聞自我化及豚  
魚仁霑草木放楚人之鵠不咎使乎驚梁君之鴈豈誅  
行者獸育豐草鳥棲平林一角以瑞於昌期九苞載叶  
於仁義瞻言過者豈得傷乎必也百獸異倫六禽殊類  
稻粱空費庖厨未供遇而見傷亦何矜其非政捨而勿  
問庶得令其維新一作令甲以人成恐乖中典欽哉惟

其惟新

恤寧失不經

解牛鳴判

乙聞牛鳴云是生三犧或告妖妄欲科罪不伏

對

陰陽不測造化多端故有夷蠻之隸實司鳥獸之語乙  
波流未息克廣前書精義不窮旁通異類告稱妖妄欲  
抵刑章即科介葛之辜實恐治長非罪以今況古不坐  
爲然

解鵲語判

乙被告殺夫縣執之訴稱隣婦不伏其罪郡以鵲來相告將可爲徵者

對

道全皆應感至必通能分禽獸之言豈專夷貊之隸公  
治長之縲紲烏語知非介葛盧之犧牲牛鳴辨數始由  
人聽終見物情乙以氣烈剛腸寃深反目素不謹於帷  
薄終取敗於嫌疑行茲亂風自抵邦憲徒嫁禍於隣婦

冀逃刑於我躬屬郡縣察微輕重不濫比夫寔數知來

頗類乎方朔驗茲鴟鵂

古沃切廣韻鴟鵂鵂

取効何異於公明

管輅

字也鳴鵂事見本傳

古而有徵今也寧惑殺人之罪按律可求孽

乃自作死將誰緩

神爲異聲判

甲邑里有神爲異聲所不供太陰之弓請科之訴云掌

非武庫

對

至若日月薄蝕君臣著象夢轉歌於童子聞取幣於嗇  
夫伐鼓迴輪有祇膺之事迹陰弓枉矢開救射之規模  
義雖責於上公物終列於庭氏藏非武庫救即羣妖何  
邑居之有災見主司之不務殊若在已近欲幸人既闕  
五兵之威因虧十日之號實古安切擾也又於典良  
尸厥官思取義於磔攘請論刑於徽纆

弓矢驅烏爲判

詔賜蕃客宴有司不以弓矢驅烏爲御史劾之詞云非

祭祀之事

對

蠻夷磨至潔牛羊以宴私弓矢載張備烏鳶之鈔盜苟  
饋食而則爾豈薦饗之獨然况乎要服在庭舌人委體  
方示懷於犒飲胡廢職於毆除且賓主恪恭須防墜鼠  
之穢牲牢備禮寧無攫肉之虞曾是闕於弦弧復何徵  
於擊豕疑周禮盡在旣專分鳥之司陳力自乖宜憚乘  
駘之効

蕃客求魚判

蕃官

一作客

至鴻臚寺不供魚客怒辭云獺未祭朝議失

隨時之義

對

沙漠實來供宜必備澤梁有禁殺則以時信能及於鯤  
鮪化方行於蠻貊彼鄉之屬得禮之中雖諭以象胥或  
聞彈鋏而徵諸獺祭未可振緜既懷友

一作支國語禮之立成者爲飲

飲歌名曰支以享夷狄疑用此事

物之虞遂阻烹鮮之請辭不失舊事



必有初是曰國之典常焉用隨時之義且駒支昧禮信  
未習於華風里革見國語當朝返有迷於夏濫矜其異俗  
責在有知合恕過求姑懲輕議

獻千歲龜判

戊獻千歲龜有司以欺罔舉科訴云得之於叢著之下  
對

獻其介物雖合疑年驗以生著則當有數戊得茲外骨  
藉自幽叢嘗聞見夢之神將期百中况察退藏之所足

辨千齡冀令僂句不欺誰謂蜉蝣興惑盍徵幽贊寧罪  
矯誣居蔡於家則吾豈敢遊蓮有歲視子非無科之蓋  
有不知獻者此宜無罪

宴客鼈小判

甲饗客羞鼈小客怒其不敬辭曰水煩非傲

對

燕以示懷鼈於何有姑宜飲德豈誚水煩責外骨之不  
豐顧褊心之奚甚甲大將展禮旋遇過求水潦方塗且

乏大爲貴者壺飡

一作饗飧

苟備何必長而食之我惟敬於

上賓爾寧貪於介物小不能忍禮何以觀儻羞南澗之  
毛尚當遺味詎勞東海之鼈然後合歡詞未爽於小施  
怒難信於堵父

養鷄猪判

甲爲郡守令百姓養母猪及鷄督郵諫其擾人不許

對

扇以仁風阜財爲急教之畜擾利俗則多甲位列馮熊

政司佩犢將除饑餒之患用先蕃息之資俾爾生生非  
予擾擾二豨既侔於龔遂五牝足驗於陶朱訓養雖勤  
割烹斯利既符孳貨庶罔食貧使荷蓀之夫不空爲忝  
倚杖而牧豈獨割菘人無見卵之思俗皆掩豆而祭寔  
惟務本焉用他規且異米鹽之煩寧懼糾繩之諫

父病殺牛判

壬父病殺牛祈禱縣以行孝不之罪州科違法

對

力施南畝屠則干刑祭比東隣理難逢福冠帶縱勤於侍疾銜刃寧同於彼祆壬憂或滿容殺非無故愛人以德未聞易箆之言獲罪於天遂抵推肥之禁志雖行孝捨則亂常父病雖切於肺肝私禱豈侔於繭粟且宋人皆用或免乘城之虞魏郡不誅終非棄市之律今不惟反政是以常縣恐漏魚州符佩犢

狗傷人有牌判

癸家養狗傷人乙論官請償辭云有牌記行者非慎

對

畜狗不馴傷人必罪有標自觸徵償則非既縣迎吠之  
書寧忘慎行之道癸非用犬乙豈尤人防虞自失於周  
身齧噬尚貪於求貨有牌記而莫慎則欲請庚無標識  
而或傷若爲加等徵詞可擬往訴何憑

牛觝馬判

得甲牛觝乙馬死乙請償價甲云在放牧處相觝請陪  
半價乙不伏

對

馬牛放牧蹄角難防苟死傷之可徵在故誤而宜別況  
日中出入郊外寢訛既谷量以齊驅或風逸而集作相

及爾牛孔阜奮驛角而莫當我馬用傷踠駿蹄而致斃  
情非故縱理合誤論在卓棧以來思罰宜惟重就桃林  
而招損償則從輕將息訟端請徵律典當陪半價勿聽  
過求


解牛鳴判

得乙聞牛鳴曰是生三犧皆用之矣問之皆信或謂之妖不伏

對

上稟天性旁通物情是謂生知孰云行怪况形雖異類心則同歸四鳥分飛聽音既稱有信三犧皆用聞鳴豈可爲妖且叶前言殊非左道爾惟不講我則有辟揆以周官業將司於夷隸詳夫魯史責不及於葛盧獸鳴可徵人言奚恤





文苑英華卷五百四十七

欽定四庫全書

集部

文苑英華卷五百

四十八至  
五十

詳校官給事中臣李臺

助教臣常循覆勘

總校官進士臣朱鈺

校對官中書臣胡紹基

謄錄監生臣劉文耀

欽定四庫全書

文苑英華卷五百四十八

宋 李昉等 編

易卜疾病占相妖言巫覡門二十三道

易卜

易道判六道

北斗龜判一道

鸞龜判一道

居蔡判一道

家貧致墨判一道

玄衣判一道

讀衛生經判一道

死生付天判一道

疾病

疾病判一道

卧大夫贊判一道

折指判一道

占相妖言

占相判一道

妖言判一道

巫

巫恒判一道

巫祠秦中判一道

夢

夢冰下人語判一道

夢殿上有禾判一道

夢處女鼓琴判一道

易卜

易道判

甲居重澤介疾有喜遂存乎辭或告其妄干他事初不  
量甲云剛德閑邪何往不利

對

乾坤既列易行其中六九斯重爻見乎外有同功而異

位亦原始而要終惟彼甲也乃居重澤當周公之迷聖  
義存乎詞及尼父之窮微意筮於象然則上下合應利  
殊攸適剛柔立體位或非居是以同心暫間端當介疾  
之失和光使終一作和聿成勿藥之喜以干事而告未  
曰知章以量力而言何哉惜識况乎形自然之變含不  
測之神古皓首而難明今丹筆而爰一作定舍而勿問  
愚謂合宜

同前

甲惕號暮夜有戎勿恤中軍按逗撓爲咎將議明罰甲  
訴初往不勝今得中道

對

三才孕育六位時成藏往闡幽鈞深致遠用明失得之  
報是興易簡之能甲亦何爲形諸卦兆居悔吝之地處  
動靜之中乍行乍藏或進或退初往不勝故惕懼而號  
呼終歸得中則有戎而勿恤實元亨之利往乃爻象之  
情言中宜按論憑何議擬括囊已是无咎逗撓寧宜有

刑

同前

丁即次得童僕乙於處得資斧在旅之時所得各別未知孰是

對

聖人作易窮理盡性君子明道體微知章發揮於剛柔而生爻觀變於陰陽而立卦用存悔吝之介式崇簡易之源既致遠以鉤深亦仰觀而俯察相惟丁乙俱形卦



兆匪以蒙而養正諒在旅而多虞異乎先笑後號豈曰  
大來小往得諸童僕知爾躬以無尤獲其資斧識我心  
之不快考即次而知是驗於處而覺非稽周家之文休  
咎斯在閱旅人之卦得失可明請探六畫之旨以取一  
言而蔽

同前

乙入於幽谷三歲不覿郡吏詰之稱澤無水以致命遂  
志

對

易之爲書解類成象因洵澤之爲體致幽谷之深潛君子是以養蒙晦明致命遂志豈隕穫於所遇將考槃而自得金車欲駕來尚虛徐朱紱方亨猶多詭碗龍蟠所以致用蠖屈豈不求伸十年反常志或斯在三歲不覲吏亦何非苟用一作有違可以無詰

同前

丙虞吉有他不燕或謂繫心於一云義及豚魚志不可

變

對

行克有孚義形於色可爲己干櫓將措身波流敢昧斯  
言不知其可丙學乎前訓從事於茲知通幽洞微設卦  
觀象敬慎不敗利用爲恒動協中庸德均上善獲此專  
吉莫知其他同夏翟之姿難儔耿介比寒松之節但覩  
青冥非無所守其不可變語稱近義敢匪聞諸易著盈  
缶死而後已豈荀息之受托終不食言何周勃之爲臣

取於木訥所以繫心於一存忠篤而不喪執志無二賤  
華美之外揚及於豚魚應彼鳴鶴或者所謂於何其臻  
且誰譽誰毀寧當盡好所以所安寔宜必察誠知言者  
不中無問吉人寡辭

同前

丙之宋得坤乾丁告遠禁丙不伏

對

丙德行純懿道術通明齒迹堯封驥邁宋國探微研奧

鈎深致遠思尚長之薄遊每敷損益同孔丘之志事載  
演坤乾丁性直狹中竒疑能劉疑善類膚受之讒想異  
皮裏之春秋發言盈庭誰執其咎今動作非妄隄防未  
渝心儻偶於木人罪庶寬於艾鞮

北斗龜判

得甲畜北斗龜財物歸之遂至萬千或告違禁詞云名  
在八龜

對

財無苟得義不厭取若奉業以往積而無

一作向

傷或非

道以行動且爲害於稽爾甲爰契我龜已見負圖不獨  
七星之號空嗟入夢詎終千載之期是諸侯之寶念彼  
當畜非宗伯之屬其誰敢私豈伊匪人妄致諸積迹罔  
厠於主守家用保於神靈徵以從長占八九之數窮於  
旣厭收千萬之盈茲乃多藏且不預於官事靡當知禁  
亦可畏於人言必曰職我之由守而勿失名可覆視余

無爾刑

覺龜判

甲覺龜不辨名物將罪之云且覺而後辨

對

有龜之德徵神爲用稟靈千歲遊質於芳蓮納錫九江  
彰名於禮物取其象事知變占事知來然以寓莊周之  
談時聞曳尾挂豫且之網寧知剝骨緬懷於甲時惟卜  
人將言覺龜以考其象理宜別諸名物定乎吉凶俾春  
夏以宜左右必順有紊於制實惟伊何欲寘戾焉事可

訊者何則取十朋而分睨弁乃先覺以爲尤參五行以觀兆數雖後辨而未失覆其兩端願言一問

居蔡判

得甲居蔡曰一作寶人告以爲僭不可入官訴云僂句不余欺是以寶之

對

魯道浸微守臣喪職眷茲臧氏代稱冢卿方構禍於家門始有誣於內子問則以默察而愈欺理異斬關之爲



跡同據邑之請三年一兆既徒稽於大蔡始僭終吉彼  
何幸於織人故帝舜格言惟先蔽志宣尼垂範數而爲  
黷則知禍福無門通塞無數焉有性命之理存乎卜祝  
之間若廢興之道適然是善惡之徵一貫人與僭而不  
入因君子之明刑

家貧致墨判

易人家貧致墨以自給科惰農

對

藏往知來道高三聖內貞外悔名重九經所以大決狐  
疑先定人志焉得捨其三易紊彼六官賜帛無聞仰滑  
稽而慙妙致墨多中知儻句之不欺覺筮短而龜長遽  
變常而易業雖百錢取給有慕君平而四體不勤孰爲  
夫子智有所達鑽祀骨而觀貞神則何施抵凝脂而獲  
戾且以業爲兼善才貴多能端策拂龜罪不加於詹尹  
收咎解網刑請寬於易人

玄衣判

季冬命玄衣督護貞來歲之慶蕪人作而揚火以非青  
純而不致墨執法告闕於太常訴云主巾笥者之過

對

道月戒期周乎四海

一作象

卜年貽慶稽彼十朋蕪人職

在巫咸用方心而考吉材均季主負

一作均

圖背而知來

拂此玄衣異夫青純有殊命寶何能致墨執法以簪筆  
彈珠且問九江之錫主司以巾笥藏骨莫辨千年所留  
既虧玉兆之獻須抵金科之罰徒爲薄訴誰之過歟

讀衛生經判

甲讀衛生經而知吉凶乙告違勅法司科擅卜禁刑

對

圖緯垂文龜著著象聖人操洞微之柄達者究索隱之  
端故知盡性窮理惟賢與聖是以魏稱管輅晉有景純  
卦成而洞曉吉凶繇發而潛知倚伏此皆竒才出於天  
骨遠識符於自然爰逮凡人不甘一作其議所以時忌  
惑衆勅設禁刑甲雖沉思緯象遊精數術名止齋於庶

品道豈同於古人冒違勅之明文自貽伊戚挂繩非之  
峻筆何所逃刑然慮或告不真法湏更審請窮兩造方  
定片言

死生付天判

得丙請與丁卜丁云死生付天不付君也遂不卜或非  
之

對

白居易

聖人建易雖用稽疑君子樂天固宜知命苟吉凶之罔

僭何中否之足詢丁執心不回出言有中爾考前知之

兆誠足決疑吾從

一作我微

昆命之文必先蔽志以爲禍福

由已休咎則繫於慎行生死付天脩短乃存乎陰陽當  
脫身於木鴈寧問命於著龜言旣中倫理亦窮性况詹  
尹釋策有問焉知闢廡立言不疑何卜不從握粟是謂  
忘筮

疾病

疾病判

得甲爲郡守賜告養病而出界歸家法司科罪甲不伏

對

四嶽咨命九土司牧功共理於伏熊期得賢於建隼淮  
陽卧理聞汲黯之政譽渤海行歌羨龔公之化洽甲官  
忝列郡未著能名庭無致仕之蘭院少延年之菊漳濱  
卧疾雖比於古人頽川流譽何覲顏於今吏膏育所及  
知藥石之無施肝膽俱披果祈求而有遂賜告養疾宜  
輟務於公庭出境而行何慢官於私第斷非斥吏欽漢

相之高風才不逮人招施祿之過謗予告賜告義理懸殊應爲不爲自貽諸咎不敬之罰曷所逃刑

卧大夫箐判

甲寢卧大夫箐執燭者請易竟不改而卒

對

喜怒不時患生媵理營衛失度疾起膏肓是以長卿文園空傳封禪之草劉楨漳浦亟聞埋玉之悲人誰不亡道貴從正身苟正矣哀亦何傷且衛臣不祿猶陳尸諫



楚尹屬續城郢爲謀春秋書之用旌厥善况銀燭晶晃  
以流照華筭輝煥以潛鋪旣不率於典常法宜加於僭  
擬必因國君之賜有孚曾氏之詢過也非文童子何識

折指判

甲緣木損折枝指謂三疾數足官不許事

對

甲稟氣陶形偶華胥之代輕軀弱質謝都盧之人不能  
鑿井耕田翻乃奔林緣木損其枝指盖是懸疣雖折一

枝幸祛數外之累即圖三疾便爲非分之求理不可依  
宜從告免

占相妖言

占相判

甲告乙左手有文直達中指丁爲占若過橫節貴不可  
論乙遂挑徹血流彈壁乃作公字

對

命理多途幽明罕測甲惟愚品丁也狂夫憑仲子之有

文相士行之當貴虛論骨象謬定吉凶豈識李固之龜  
文莫辨條侯之縱理聖人不相抑有前聞鄙夫何爲則  
預於此

妖言判

王遇於鄉間妖言村人告事

對

王遇稟性不臧立身非謹官雖登於一命慮猶闕於三  
緘不忍口闕坐彰言玷妖詞妄作雖未惑於平人正罪

應論事可繩於峻典定刑名於木吏應入流條量減贖  
於金科合從徒坐

巫

巫恒判

巫恒堂贈鄉人反接置於廣柳

對

惟彼巫恒志探幽蹟以爲堦籬有禮堂贈無方式從招  
梗之義自得禳禱之術鄉人悟不知之毀迷獨見之明

恃衆生威率情含怒同舞陽之從代鎮已能反接異季  
布之適朱家翻爲置柳處之刑典豈待邦成請從片折  
之詞以白違行之訟

巫祠秦中判

南山有巫每祠秦中輒用王禮所由不禁御史詰之詞  
云恐爲厲也

對

神祠所置祭享有由苟非國章無列祀典是以分巫覡

之職審鬼神之狀恐伯有之爲厲矜胡亥之乏祀小大  
從時輕重不越明無天昏之患幽得憑依之方生旣殊  
於庶人死何廢於王禮謂執憲之徒詰宜所由之不禁

夢

夢冰下人語判

得甲爲人作媒云夢立冰上與冰下人語當仲春成婚  
乙告甲誑惑

對

甲以判合爲資行媒是務瞻言匪斧有類因針爰求六  
夢之徵告以三星之會微波可託豈脉脉於輕冰仙漢  
難攀尚盈盈於一水將同竹鳳之驗有符芻狗之言乙  
以至人所無告其狂惑必人同趙壹術等周宣王濬懸  
刀不聞加罪孔丘曳杖未蹈深憊

夢殿上有禾判

乙夢太極殿上有禾三穗跳而取之得中穗其友賀云  
中台之象人告其妖

對

執古以道格人其經捨而或踰動則奚軌乙位居堯岳

名列漢藩擁百姓

一作成

之寄乘六龍之吉朱門雄雄虛

受冠蓋翠樓奕奕傍注煙霄同唐叔之得禾身居大殿  
異張華之博物忽踐中台覺後成空賴功曹之來賀失  
而復得允蔡茂之高班夫何妖哉古則有矣告人無識  
其若是乎

夢處女鼓琴判



乙封侯嘗夢見處女鼓琴而歌曰美人熒熒顏若茗之  
華後遂納國人姓爲內子御史劾其僭訴一作云夢應  
也

對

國以定封邑惟利建社稷是衛邦畿以藩乙將度以土  
圭設其苑序式遵厥度宜立其家鳳凰之兆未期桃李  
之妖將至剛柔自應精爽潛通吉以有祥將一作表神  
來之兆庶乎無亂理齊藏往之感位在通侯夢茲處女

橫角枕而就寢見鼓琴而作歌熒熒之詞聞彼魂交之  
日夭夭之質觀茲形開之時六夢之驗若存八徵之候  
如會納爲內子誠類小君稱僭欲繩未通平典

文苑英華卷五百四十八

欽定四庫全書

文苑英華卷五百四十九

宋 李昉等 編

雜判門三十七道

廳子判二道

流外判二道

審官判二道

孔目判二道

公廨供給判二道

不知名物判四道

不奠其祿判一道

侵官判二道

小吏陵上判三道

黜免判一道

去官判二道

吏脫幘判五道

致仕判一道

不仕判一道

未七十致仕判一道

用蔭判一道

徵官爲蔭判一道

假蔭判二道

勲品判一道

請立長子爲嗣判一道

廳子判

廳子執硯翻瀉汙物擒獲欲科之

對

瞻言署曹克崇廳事既分官而揆務異虛室而清神華  
茵載敷綺屏儼立頗有尊卑之禮須知進退之儀彼何  
人斯輕其主守迹既殊於審慎事終致於愆尤足待數  
知有慙對馬墨因誤點更射成蠅坐彰怠慢之心須示  
鞭笞之罪且刑貴閱實政蠹深文汙雖有憑物終未驗  
儻非情故或可矜容請稽源流庶符明慎

同前

各備爾曹以供其職聲輸水操同洽風規公府凜潔具

察瞻矚事光文物掌設防非猶衆派之源流若提綱而  
集目尚恐禽棲入噪絡青瑣於傍喧蛛網交絲架朱窓  
而上掩豈意故爲翻瀉用漫章程德不繕心罪亦旋踵  
違周氏之戒器水覆繩愆覽劉氏之朝衣羹傾宥過法  
開有誤理亦從宜

流外判

流外解請兵部勞所由不許訴五品以上

對

百度之間見於甲令九流之內言念胥徒在邦必達於  
大體爲政不遺於小物歲之云晏更議初勲勞之可書  
仍祈後績慕縉雲之職名級願遷瞻巽風之命節文當  
協所由以司存必舉稽彼三章訴者以理實無言徵諸  
五品既詳於法難屈爾詞

同前

十等分賢九流殊致異漢儀之命史若周官之爾胥頗  
供操牘之役寧有策勲之義具聞奸命復欲冒官未輸

自貽之辜仍引無稽之訴縱已榮叅朱紱其如匪是清流鮑魚不可登庖笄冠豈宜雙履抑而未許寔謂有司

番官判

番官請稍食不給訴求達吏

對

番官名書小吏位列羣胥自宜恪守邦程勲一作動從吏

道何得叨祈稍食苟徇私儲瞻彼有司出納惟愆閉而不給雅合良規何所未厭仍勞上訴將求達吏雖且覬



覲考以通章恐成牴牾何則國之甲令懸諸日月如或  
番程式序歲考茲深昔年自有常規今日何煩妄請

同前

六卿分職百揆時叙開之以府寺間之以胥徒所以理  
天下之人將以成天下之務雖動珂振珮嘗聞獻納之  
臣而負版持囊亦資趨走之吏番官之輩寔惟卑冗九  
流未齒一命何階心有規於斗儲意仍希於稍食參尋  
甲令緬覲彛章事列科條誰敢踰越

孔目判

得諸司長官初上皆孔目所由不送依問已付散官遂  
被遺失

對

建官分職揆務班司是稱會府實宏邦教綠墀黃閣棘  
寺蘭臺廨署星分胥徒雲集瞻言管轄必先鄉尹案牘  
填委簿領殷繁剖析是憑準繩斯在事資孔目以備闕  
遺而小吏寬疎下寮弛慢不恭爾事擅付他人因而致

失誰任其咎散官闕送自合科繩請更推尋方寘刑典

同前

百揆分曹六官咸事由來區別各有司存旋降絲綸遽  
覃簪紱令首政長寔繁有徒衆務條流須施孔目憑之  
以提綱紀藉之以恤機衡爰洎有時彰乎無替所由自  
宜遵奉所闕須有科繩散官非受納之人小吏是施行  
之輩苟乖其事盍寘於辜恭視事端方取誚於周客敬  
尋失狀欲何黜於堯封據律不見本條論情有虧通典

請歸司敗以正刑書

公廨供給判

丁以公廨供給親屬郡科之云亦是賓

對

盧藻

祿以馭賢矧茲賓客將不速而是敬豈乾餼而以僦眷  
彼丁也給茲親屬未聞輟己之仁且有害公之負於焉  
獲譴何以爲詞然獄貴原情事資愜衆必若行高曾史  
才茂鄒枚輩食屢空未改顏生之樂樵蘇不爨能師范

子之廉乃謂國賢豈惟家食以之恤乏何必正名

同前

受祿必資善戒飭躬且務勤王反是不思罪亦難逭彼  
丁何者忝曰吏人苟徇私親以減公用式彰不令曾是  
養求重歛聚財可謂同於碩鼠食貨棄命曾不思於伐  
檀若情在恤貧志懷調急奉其祿秩則可給於公廨而  
何雖曰衆賓終爲多僻羣司所糾允執厥中

不知名物判

得乙是甲吏之賤者問所掌名物而不知被科訴云蒞  
事日近

對

陳力以位任才居守列王者之職百度惟貞在有司之  
能庶官奚曠惟乙績乖幹蠱名匪靖恭等韞人之從吏  
周行是處均倚相之言詩祈招以感何則窮爲下士秩  
等上農莫究端倪孰云主守未聞數馬而對如何尸祿  
以言匪課月成徒稱日近請抑無稽之訴以從司寇之

罰

同前

執伎事上各有司存學古入官固非失職將守其業用  
不易方必也正名無敢反側惟乙賤吏實曰函人忘其  
下旋上旋之權失其犀甲兕甲之屬訴云近涖豈曉壽  
一作年化疑作農功之越思同美錦而學製惜其名物  
主者不利於操刀正以刑書所按乃得其資斧

同前

國有等威秩分貴賤必恭爾職乃罔後艱乙何人斯吏  
之賤者匪懈於位無聞幹蠱之美不思厥職遽招尸素  
之刺且龜玉見毀誰之過歟名物不分信爲罪者貽曠  
官之罰自己包羞以近日爲詞是亦文過必若德同周  
勃才異晉夫當寬呐呐之人無求喋喋之口待窮閱實  
乃爲不弊

同前

在心匪懈蒞事克勤實曰司存惟其慎敬不率厥訓自



貽伊戚瞻言乙者叅名甲吏當恭爾職知闕鞏之重無  
廢所掌在組練之堅焉得曠官孰云從事且孔明輔相  
猶獨親於簿書彼乙微品何不知其名物請寘於理以  
懲不能

不奠其祿判

得主司納錢不奠其祿致令不可覆校

對

正其歲會禮有明文錄而書之物合定數莫不登於天

府計以月成諒比要之可遵將奠祿而爲準憑茲出納  
乃絕姦欺苟或差遺自貽乾沒龜玉在櫝宜勤夙夜之  
心刀布如泉何忽隄防之禁覆校斯闕罪累匪輕忝曰  
主司殊爲曠職但三尺之法期閱實以定刑九兩之官  
闕連事而同坐必若甲乙俱犯上下相蒙規攘竊以故  
違自胥徒而共議物又全曠情實難容如其數則非多  
訊之爲誤有納處而可驗恕不逮而須矜請紓辨璧之  
疑方寘鈞金之罰

侵官判

此題及所對二篇當在五百四十四卷國城門今  
已移入姑存其目

小吏陵上判

得丁為小吏好陵上為人上操下如東濕薪議者稱酷吏  
曰其理有所効

對

為官擇才以政化物先甲申令著於易象惟丁者何効

茲酷吏循牆之敬已殊於考父東濕之操將類於寧成  
陵長而六逆在茲滅德而九功失序且仁以爲寶嘗聞  
得國犯而聚怨焉可定居旣紊彝倫之經莫知哀矜之  
道國之蠹也刑其念哉

同前

在下陵上昔賢所耻嚴法峻文平國不設是用敏於從  
事可以臨人必也允乎平反方堪議罰丁爲小吏不慎  
厥躬未能謹恪以執謙恭之道縱是暴慢且招苛酷之

名奉上有類於寧成操下乃同於東濕孽則自作罰實  
難逃雖欲文過引人無乃執迷於已

同前

曹詵

九命攸分百工惟叙率溫恭以成政資謙讓以恪居丁  
屈蠖未申搏鵬始舉且安身於小吏期漸陸於大來將  
能克已爲仁翻乃直而無禮誘人孔易寧昧政於蒲蘆  
雨雪其滂奚取方於東濕不賢內省見惡探湯何寧成  
之可師逢郅都而陵忽斯爲酷吏允叶班書欲因效以

辟名實文過而取諂

黜免判

得諫議大夫廖真坐事黜後既寢病猶用大夫之笏御  
史舉其非法大理斷無罪

對

廖真干祿從班既處大夫之職立朝束帶須勤公正之  
心不著芳聲俄嬰罪累人非士師同展禽之三黜才異  
河陽若潘仁之再免既而巢鷲作爨止鵬成災膚膝乖

宜初驚二豎之夢手足將啟終切九泉之悲眷彼禮容  
須依貴賤瞻言令式亦具科條有德乃合旌門無官誠  
宜易箒不思林放之問有昧曾子之儀憲局彈違實得  
其所

去官判

得甲去官居白沙里人云我家池中龍種本縣科里人  
妖言訴云美其德讓不伏

對

度地居人量地制邑九有既又萬邦是孚甲密勿具察  
僂俛從仕陳力就列罷職言歸克昌拾芥之榮方展維  
桑之敬爰居爰處以遊以娛且故國之生平即襄陽之  
耆舊人之仰德我不求蒙譽擬潘安聞諸鄉曲榮參龐  
統頗曰池中發其言而有由連其辜而未可請以里人  
爲美無宜告者稱妖欲措常刑其如反坐

同前

甲孝以居家學以從政非子房之晚歲翹想赤松類元



亮之中年棲神素里琴書養德道義資身青雲舊遊惜  
鷄行之中斷白沙鄰好善龍種之來歸異趙壹之招嫌  
同任光之見愛孔子垂教在家必聞程鄭有言寵而能  
降善莫之大復何加焉至如勝友如龍高才比鳳渥水  
千里丹山五色語其事類蓋亦繁多考以條章實難科  
罰

吏脫憤判

得丁爲吏脫憤挂縣門而去斷不應爲

對

田園燕坐

一作坐燕

知陶潛之罷職冠冕已挂見疏公之出

祖雖吏同推擇而道在雲山脫憤而行不顧棲鸞之局

觸網嬰坐何逃逮隼之司必也避譴韜光輒去無宜免

憤况乃銷聲自逸既往不咎挂冠緬維晉史拒

疑作詎

抵

蕭章矧當堯舜之代宜縱巢由之隱欲加之罪其無詞乎棄高蹈而可嘉雖小利而何失竊詳州斷未叶通規

同前

楊春金

天育萬類人含五情行藏殊途語默分緒故有燕安榮  
利入朝廷而風趨脫落塵紛遁精白以雲卧丁以情忘  
寵辱跡尚真閒陶潛屈身繫在彭澤安石有志終憶東  
山厭吏隱之喧卑倚劍不樂出都門之慷慨挂幘長辭  
得五倫之遺風掩逢萌之往跡清聲可以激貪鄙美事  
足以光圖書于何不臧反以爲罪昔漢皇御宇且高䟽  
廣之才今唐堯握圖宜遂許由之性

同前

瑰意琦行有應則通陳力就列不能則止故營營吏道  
坐州縣而徒勞寂寂閒居退丘園而優逸丁也縣吏職  
事前脩挂幘公門頗遵孤節角巾私第自得遐心州以  
小道從方恒科守職白雲已遠尚勞增繳之心尺蠖相  
趣未識江湖之意責其廉退之節科其高潔之辜欲使  
䟽廣厚顏陶潛負謹僕雖不敏竊謂非宜

同前

汜雲將

學古入官式著墳誥

一作典

陳力就列聞諸聖人丁則齷

生頗爲高尚欽陶公之五斗初聞折腰同方朔之一囊  
且安卑位作勞州縣早結梁生之悲挂幘公門晚慕伯  
魚之操齊季鷹而命駕不俟秋風想仲翁之辭榮近歸  
蘿月江湖道逸狎魚鳥而爲羣龜墨信榮將松菊而齊  
致况大君有命廊廟須才旌帛日賁於丘園山林不容  
於隱遁欲將無悶未可即依

同前

竇 暉

喧寰易擾野性難馴鴻鸞不處於俗中珠玉自生於塵

外丁至情無欲含章寡詞琴書未入於山林刀筆久勞  
於郡縣清風忽至白雲意多拂衣不留挂幘長往陶潛  
之美志斯在疏廣之芳猷未歇幽谷歸來高山可仰州  
司牽於常法責以詭時欲處伯魚之刑實恐冶長非罪

致仕判

渤海縣高邁高秀歷官清途位望崇重及懸車之歲挂  
冠辭歸於邑邑宰白雄令吏置酒肉於其家吏於道傍  
停肉爲鷓鴣所食還以此報雄不之信命官屬科之

對

李思齊

高邁高秀俱承茂族惟兄惟弟各登清官故能望高陸  
寶價重韋珠棠棣春風芳菲兩襲桑榆日暮光景同歸  
挂冠冕於東門方休白首奏絃歌於北里直散黃金邑  
宰率由舊章禮弘於羔鴈縣吏恭承嘉命事失於鷓鴣  
伏念刑書眷言惇史大夫學吏獄雖成於鼠偷京兆能  
官罪不加於烏攫

不仕判

得丙有志行隱而不仕爲郡守所辟稱是巫家不當選  
吏功曹按其詭訴丙不伏

對

鳴鶴處陰聲聞於外玄豹隱霧樂在其中此將適於退  
藏彼何強之維繫丙業敦道行志薄宦情太守以舉爾  
所知將申蒲帛之聘夫子以從吾所好不顧弓旌之招  
懼俗吏之徒勞引巫家以自穢冀其言遜獲免翻以行  
詐論辜况商洛拂衣漢且求之不得潁川洗耳堯亦存



而勿論天子尚不違情功曹如何按罪

未七十致仕判

得乙爲大夫請致仕有司詰其未七十乙稱羸病不任  
事

對

時制未及尚可俟朝疾疹

集作  
店

所加固難陳力乙位參

食采志在懸車揆以紀年桑榆之光未暮驗其羸病蒲  
柳之質先零既稱量力而行所謂奉身以退雖髮未種

種告老無乃速歟而心旣諄諄致政固其宜矣請高知  
止無強不能

用蔭判

范融曾祖在周爲六部官在隋居家不仕今兩應出身  
及爲人後者從高叙情取徵官蔭可不

對

邵旻

范融係塵甑之苗襲良弓之裔爰瞻乃祖委跡前周道  
煥九徵禮光三辟運遷正朔載掌丘園翼子謀孫雖慶

流於後嗣論官叙蔭須屢降於前朝必令許從高議蔭  
減未盡斷從依請夫復何疑

徵官爲蔭判

乙請以父徵官爲蔭所由以其父不在用蔭例

對

劉銘

以功受賞繼統承嗣父不食於周粟子罕取於吾餘乙  
家尚隱淪素行貧賤固知鶴鳴子和配幽貞以就閒安  
得孤侵父名苟僥倖而求庇傳業且違於父志請蔭寧

沐於君恩昔傲天書不脫薜蘿之服今從地勢難依桃李之陰所由不許誠哉此見

假蔭判

甲爲人後請準蔭人色所由以同假冒甲訴法有差等

對

陶翰

有國之制不易於常典王者之政未忘於繼絕人則不幸同叔向之有言天道如何比鄧攸之無子甲義當爲後情切自孤名不絕於本枝愛未遷於他室克聞鳴鳩

之德寧爽螟蛉之義知子之道必全見父之行無改將  
議繼體那慙象賢主禮方列於宗門入仕曷由於庇蔭  
苟從法之差等亦在禮之何傷所由無端雖不憂懼訴  
者有據應異無文

同前

李康成

不享非類將以亢宗無念爾祖詎思述德甲庇身他族  
忘情本根頗類移天之規方同擇蔭之義將策名以筮  
仕豈假蔭而因人約法是從不繼難失必若教有餒而

之歎庭堅有忽諸之言以爲等差誰曰非允如子復其  
有子寧斯焉而取斯

勲品判

宋臣前任視流外得勲品請依視品定階

對

宋臣位未名卑迹參郎署前任後改亦異階資欲定見  
任之階希取視流之品且視流與正流旣別勲品將三  
品斯殊階雖請於後高品終在於前任章程可據體例

先施犯罪雖許同科定階難爲共貫宜從二品庶允三章

請立長子爲嗣判

得甲告老請立長子爲嗣長辭云不能請讓其弟或詰之云弟好仁

對

讓賢雖仁廢長非順徒聞見善則理其如亂嗣不祥甲告老於朝立嗣於後集作爲後雖急難自舉必有可觀者焉

長幼以倫無所苟而已矣况欲正其爵位豈宜越以鴈  
行子弟克恭厥兄徒有好仁之請知子莫若於父蓋集  
作

蓋從立長之言無忌雖欲傳家季札終當棄室諒可致

告罔聽不能

文苑英華卷五百四十九



欽定四庫全書

文苑英華卷五百五十

宋 李昉等 編

雙闕門上十二道

不帥熨寄軍獻二毛判一道

借罐打破佩刀刺人判一道

行盜斃破奴死棄水判二道

夾與合三所知哭寢判一道

選擇卒史刑罰疑赦判一道

萊田徵稅閒人執事判一道

醮子於詐醮子於宮判一道

賜告養病父在喪母判一道

漆室染瘡緋衣版授判一道

戰勝銘功火災貯水判一道

毒藥供醫登高臨宮判一道

不帥焚寄判

國子監稱胄子不帥教將棘寄之省讓其侵冒刑章賓

疑作之於理監固論不已

軍獻二毛判

又軍旋凱獻俘毛有二者執法止而劾之軍司云拔距

投石者

對

苗晉卿

文以經邦武以禦寇開石渠而設教整金鼓以宣威爰  
施上下之庠式奉孤虛之術語茲國序相彼軍容槐市  
立談一作經未展先王之禮柳營作法但見將軍之令摠

衣不聞守道掾甲已見伐功靡好成麟之名且許貪狼  
之意入室雖無鼓篋出塞終有解鞍旣虧來學之能當  
令誘進未識出師之律誰爲否臧縱暴虎憑河猶其三  
省豈拔距投石方擒二毛夫子之道未行齊侯之失斯  
在自可因其零詠令爾志之各言豈得承彼凱歌遂責  
人之不法投諸焚寄稍均束濕之嚴効以干城恐挫橫  
行之氣矜乎愚戾何異宰予勸此苦辛宜哀去病握蘭  
稱過正合清明執簡彈違稍乖深識欲存疎網寧失不

經

借罐打破判

村人借罐人家罐未出門戶打破未離本處

佩刀刺人判

又有人持佩刀傷人縣以爲用刃州以爲非仰正判

對

王 絃

九野太清兆人承慶鑿井而飲方聞射鮒之泉持刃以  
雄仍均佩犢之日澄瀾可汲思抱甕而無階銛及將揮

提刺鐘而可擬故廼旁求假器甫當於銅瓶何輕用傷  
人有類於鉛筑衡門未出遽覩虧全踈網難容俄聞寘  
罰訟端斯起異共敝而無憾刑柄終疑遂殊條而靡決  
慎非投鼠破則宜陪法在鷓鳩傷固難追比盜之訴不  
亦厚顏用刃之科誠非次骨文漸陸海畧落三晡空有  
薦於芻詞諒輕塵於藻鏡

行盜甕破判

甲負甕行被乙盪倒甕破索陪乙不伏

奴死棄水判

又丙奴死棄水中人告之

對

呂因

埏埴成器蓋資虛受之功役使爲臣同稟最靈之德他人毀棄緣錙之直合酬營魄銷淪埋瘞之義無隔甲行負甕雖有類於戴盆丙畜家童情有虧於物議方漢陰之抱汲初未忘機等蜀郡之裁書唯資力使旣而途遘卒遇瓦解無全命迫力殫舟藏共遠不忘情於毀甑乙

合償其錐刀方念舊於敝帷丙須施其薪轄已虧讓行之美更章速朽之尤折其片言勒陪半價辭名冊籍委骨滄流死埋應切生情寔爽既違掩骼之典宜從束矢之科

同前

惟甲與丙殊途異致或行因負甕頗類漢陰之賓或家有役僮不讓江陵之樹旣而甕被盜倒奴則云殂鑿坯無返於在甄丹籍忽辭於白日原其情理覈以根由責



之以陪未盡其義棄之於水何太不仁但法貴從寬事  
或通誤必也康莊廣陌甲負乙棄矜其輕肥故此行突  
將徵其價尚或未懲如其狹路稠人風昏日暮邂逅而  
損知欲何傷若取全陪恐乖設律至如畜生之罵猶慮  
其慙覩犬馬之微不棄其帷蓋藏諸廣柳之內託義彌  
深葬以江魚之腹在情焉取旣爲人告不可無辜請施  
懲罰輕科以符捨事闕意

夾與合三判

勅造夾臬少府合三而成規不九科罪

所知哭寢判

又太史令緒所知亡哭於寢門之外人告違禮

對

蔣勵已

武有七德戎械攸先禮有五經喪紀爲重少府秦卿命  
爵海稅孔殷太史吳將疏苗家聲允迪天有成命式裁  
弦木之規人之云亡來展生芻之弔雖圓鑿方枘恒必  
由之而同波異瀾區以別矣何者弧矢之利張皇國威

俯企之儀擗節人序理宜器因古式自取妙於烏號禮

合前聞固無譏於鼠刺昔宋公研慮妙畫踰山齊婦銜

哀深辭在野

一作弔  
深辭野

何得輕其瑀葺命不審於絲言忽

彼朋從慟無依於總帳遂使規殊宛轉未全明月之輝

交喪親仁遽異成風之質且天子䟽制佇九合以成規

友生不幸拊百身而奚贖魚膠象弭已爽今儀白馬素

車全珠昔契造虧夾臾豈獻春材哀僚寢門徒悲宿草

眷茲有失請依漢相之科推彼無儀深惜鄒人之識或

恐規聞異制制因義而隨時禮有異文文緣情而僣俛  
自須見可而進未必同年擇善而行寧俟終日

選擇卒史判

有司選擇卒史以文學掌故備員有比百石以上誦多  
者先求之不得訟如功令

刑罰疑赦判

又甲刑罰之疑俱赦有司并刑不上備省科之云適輕  
下服諸罰有權

對

政以經邦揆務刑以禁暴去邪先王論於股肱大易明  
其噬嗑故賢能必佐小大以情立綱紀於天官作規模  
於秋典其來尚矣難可忽諸才有所通或徵諸管庫法  
有明象乃著自星辰所以掌故備員擇先文而後學刑  
法俱赦執有權而適輕蓋晁錯惟勤昔聞其任呂刑高  
議已盡其能興訟者何秩既下於百石折一作中者理  
條不紊於三千必也口無擇言身無擇行誦先聖之典

誥有夫子之文章自合昇之司徒而曰俊士建功於當  
代垂裕於後昆未能鳴鶴聞天而乃嚇鷓從事誠宜改  
革徒以盈庭息乃訟端寢乎功令如有倫有要不僭不  
忒定國之慶溢高門蕭何之約在關中雖并制一作刑不  
上亦片言可折省之可罰甲也有詞法貴從寬難明與  
罪

萊田徵稅判

萊田舊不應稅州縣今有徵納

閒人執事判

又客戶閒人請移執事

對

國家分出輜車董諸田戶斂

一作致

我唐典藝夫周舊

一作

官別農郊以沃瘠貫流庸於版圖何疑於菜田之征而

失於閒人之職豈徘徊中曲候

一作候

周郎之顧將疑後

素招子貢

疑作夏

之詞然乃疆名旣訓嗇業須分上下宜

繫井丘有苗而畚均其易歲自門及野化

疑作比

以同人

若未給於棠陰或恐隨於蓬轉惡夫外臺徵稅尚起異

門客戶請移方狗常職且禮有恒歛豈宜據於故

一作訟

人改執事何必越於鄉寘加於刑便以愛羊廢禮立案

爲限知其爲地盡足必也政弘通變人急遷移稅錢或

致於所收州縣難辭於爲擾事未重詰愚或痛

一作病 諸

而執簡書刑使不若凶年人散省其謂何理在甄詳方

可寘定

醮子於詐判



得甲醮子於阼素積以戒而尊有禁

醮子於宮判

又醮子於宮玄端以戒而姆加丙或告其非禮云古之道

對

晁良真

始乎冠婚是惟達禮貽之訓誠用肅令儀今昔或違沿革斯別始弁髦而便棄實表成人初結褵而遂行或諧嘉偶甲以將雛襲慶元服就加乙以鳴鳳告祥束薪言

往尊莫於禁未虧寧敬之直姆加其丙方昭有行之誨  
玄端素積雅叶禮經甲昨乙宮信於師古或者之告理  
實無從

賜告養病判

得甲爲郡守賜告養病出界歸家法司科奉制不敬之  
罪訴云予告得歸賜告亦合

乙父在喪母立凶門判

又乙父在喪母立凶門或告一家不合二門訴云禮旣

虞而作主今未有主故以重當主

一作輕

對

尚理

漢閣官儀揚眉可見魯門喪紀拊膺何言觸甲前由竹  
符持手稽乙今迹桐杖摧心專城無時堊室云入輜車  
尚動落畫弩於尊前栝棖猶存飄總帷於舍下芝泥有  
制則五馬歸來柳翼無因則九鷗相失周人已歿合殷  
禮之前虞漳濱未痊罷淮陽之獨臥稱賜則元非奏請  
出自宸衷言主則今者始為乃闋喪後病不堪理河內

無借寇之談門或以施淹中絕問喪之禮哀欲從重法  
貴從輕既無不敬之刑恕此訴云之罪三削藁疑札十  
捫蓬心恨流落之多年辱清通之此問愚所無盡謂慳  
事宜

漆室染瘡判

逢故人引入漆室遂患漆瘡訴云料理

緋衣版授判

又丙版授刺史著緋袍村正云不合

對

甲以芝蘭同味早託葵歌丙以蒲柳侵年方忻艾壽煙

火相接昔是往來雷雨或覃即承恩造鶉居鶩疑作鶩飲

共申東戶之遊鶴髮鷄皮載照西山之景既無猜於杵

臼遂有奉於絲綸攜手入門引故人於漆室披襟就服

僭常例於緋衣乙殊聶政之容相者不識丙方龐統之

秩即事何慙頭面有瘡自均無過耳目不審豈假論辜

拊其訴端堪取笑於周容詳其告狀欲何罪於堯封染

患自是晦明在法寧知老耄探情未虧於通恕據律不  
犯於正條便寘嚴霜慮傷非罪乙與村正咸釋爲宜

戰勝銘功判

得小侯戰勝作彝器銘林鍾軍正訟言妨時云示子孫

火災貯水判

又巴東每歲多火災庶使無術禁止唯令鑿池積水人  
戶稱勞

對

潘待福

理國之宜有時用戰爲政之要莫先利人先王以禁暴  
詰姦良使以移風易俗訓兵習武熊羆之士卒在和積  
習生常邛夔之火災歲有銜枚被練必狗死而輕生飛  
焰浮煙或焦頭而爛額小侯以出車受賑始希分閭之  
威廉使以建節乘軺方展褰帷之惠功成戰勝知彼竭  
而我盈今行禁止用防微而慮遠林鍾有作同季武之  
克齊瓘掌無施類國僑之相鄭軍正有訟均夫臧仲之  
非人戶稱勞昧彼廉公之化京觀不築楚功旣存積塗

而防宋災亦免因人之功不可藏示之道何施利物之  
惠爲多無術之談或爽備諸前史焉敢費詞

毒藥供醫判

甲聚毒藥以供醫事有死傷者造焉十失四乙告違法

登高臨宮判

又丙登高臨宮法司斷徒一年半丙訴云令所

對

魏牧

人生百年飲食過而生疾帝臺三襲趨拜乖而則刑故



良醫之門固多病者而望苑之地胡可窺焉甲則業謝  
醫工丙乃行同惡少雖有求於毒藥失此疔瘍乃無狀  
而登高俯其宮闕彼非上藥疾者無瘳此昧古人行不  
由徑况驗虵盃之影輒欲蠲痼而識龍樓之尊方能起  
敬醫未三代得無耻之登而四臨過亦甚矣微周禮而  
已失宜其息言按吕刑而故違合從減坐則使有疔之  
者不俗疑而自除無賴之徒伏軾而知禮



文苑英華卷五百五十

欽定四庫全書

集部

文苑英華卷五百五十一至  
六

詳校官給事中<sub>臣</sub>李臺

助教<sub>臣</sub>常循覆勘

總校官進士<sub>臣</sub>朱鈞

校對官中書<sub>臣</sub>胡紹基

謄錄監生<sub>臣</sub>蔣錦城

欽定四庫全書

文苑英華卷五百五十一

宋

李昉等

編

雙關門中十二道

鍾官不克亭長易傳判一道

同爨不服義居芝草判一道

掌麈樞放穿墻流惡判一道

襲封錄兒女代父刑判一道

常好種荔繼母出服判一道

甲居重澤田獲三品判一道

是儀書衣主司舉正判一道

旄人奏散率木脩防判一道

登城而指專席而坐判一道

元日懸象稅千畝竹判一道

罷役務農論象肉刑判一道

主司徵筭探卵窺隣判一道

鍾官不克判

庚為鍾官所鑄不克歲計工部按其罪訴稱鉛錫不足

亭長易傳判

又亭長私易傳置為嗇夫所糾

對

賈晉

六官既分百工有序五里作候十里為亭鍾官所資藉

洪鑪以鑄錫

一作鑄

傳置之用通遐方以奔走典尚方之

衡量揔亭郵

一作旅亭

之掃除位雖列於周官役乃疑於劉

氏不克歲計鉛錫有虧私易傳車三十難逭工部以禮

聞望重欲飛奏草

一作章

之刑嗇夫以傍舍竭來將對上

林之問庚有詞而難罰亭易傳而寘愆會府無妄繩之  
辜糾人彰嫉惡之德况風巖北陸日落西山仰鳳闕而  
神微擁鶉衣而思奪

同爨不服判

得王甲與從母夫趙乙同爨乙有罪物故甲不為三月  
服喪從母訴甲無義縣令王庚答甲四十死州斷庚加  
役流庚不服

義居芝草判

又虞乙家五從義居園中未生兩穗庭中產芝草蓋形  
紫色隣人告隱瑞州不斷罪亦不上聞

對

李龜年

命以義夫光昭令德俾立家室其

一作禮

或有差同爨則

總已發檀弓之問義居成瑞雅均唐叔之謠王甲冥豫  
在躬物故無服虞乙至誠必察感而遂通從母薄言因  
遘憫而興謗隣人所告何至攻乎異端德音莫違及爾



偕老制義居業光輝日新總帳空懸悲深苦月芝庭獨

秀榮曜生春

一作春風

宿草之墳未展生芻之禮擢蘭之砌

已交奠葉之陰縣令能業其官懲忿窒欲州司以明庶

政敢復未聞罰既甚於蹊田瑞頗陳於州里欲拘司敗

法也何逃或禮出異文緣情僂俛瑞符等級易有隨時

未尋物故之由難語不應之坐竚詳靈草之異方書掩

瑞之愆

掌麈擅放判

丁獲麈付已掌已愆麈放之丁毆已

穿牆流惡判

又甲孟穿牆為水竇流其惡於街衢坊人論告

對

辛則然

帝德廣運皇綱載紐鳥獸咸若閭閻且千麈卵無不時  
之求比屋有可封之美丁以庸妄謬居東戶之朝孟以  
諛聞獲染南風之化自合依仁游藝頌明王之盛德鼓  
腹擊壤成一作歌 太平之樂事何得盤遊無度肆情於麈

鹿之間穿穴匪恒流穢於街衢之內已則志惟惻隱處  
食野之長驅坊則情深嫉惡在公庭而載理徵諸故事  
已有託付之高考之今法蓋有干違之疊請科毆已之  
犯仍坐穿墻之愆庶不慚於丹筆亦無媿於青史

襲封錄兄判

得丁長當襲代封主司以有兄不錄其讓

女代父刑判

又乙坐法女請代未亂官勒從奴

對

高璠

不掩厥善代選爾勞伊人祇辟咸示中正朝廷作又大  
明黜陟使苴茅永建無替於乃服鄭竹斯刊審欺于誠  
道丁以祖孫繼體位由當室乙則戒慎不足人自速辜  
德在友于復公侯於今季既生女子濟緩急其及嗣仰  
丁鴻之清節遠且逃身慕緹縈之淳志期無鑿額有司  
務隨時之才徒高守法當官藉通變之識未宜膠柱昔  
太伯三讓公季代緒漢除五刑班史垂則行古之道仲

子所以捨孫易父以死趙簡申其禮聘相彼一時之義  
今為千載之明豈可使帶礪遂絕於承家齧亂服刑而  
代罪兄則不返封欲誰承女既年弱奴何足任範公往  
矣丁必無由理屈淳于獲宥乙女亦可恤刑景之前聞  
庶無凝滯

常好種荔判

戴子恭平居常好種荔時人以為不道

繼母出服判

又曾元母出不知服

對

易日出處語默非一途語曰慎終追遠民

唐諱

歸厚則所

好不等有如其面

一作其如衆面

合禮而作難責

一作則

因心戴

恭戴安之餘曾元曾參之後二十八宿外當處士之星

七十二人中有至孝之性幽寂水石高山景行多所仰

止信而欽風絃歌取樂無妄種荔霜露增感早切采蘭

居然傲時遵是繼母春池湛澹萋已綠風樹蕭條靜復

鳴莖葉相依亦謂盛矣此岫無託則可親之將備歎

一作

賸歲無情故匣貯期剪緝別偶雙飛將高竒致化成異  
物結而為裳思得其趣不苟制服曷所見尤楚客興歌  
江潭可想周公範法日月斯懸彼俗何知正刑不濫與  
其嗤誚豈如勿言道存固合賞人義盡理難論罪

甲居重澤判

得甲居重澤介疾有喜遂存乎辭或告其妄干他事初  
不量力甲云剛德閑邪何往不利

田獲三品判

又丙田獲三品自稱有功所統斷為強暴天物且違時  
禁丙請三司訴持法不中

對

魏嘉慶

麗澤作兌馳騁為獵大易克演老氏攸誠故違者匪宅  
是卜終莫之陵愚者動而離制事不師古甲也所處得  
八卦之龜奧丙其于田獲三品之獸物介疾生喜式損  
於悔吝自銜厥功載象於士女詳諸訟者反而不思稽



以斷之固未為失初尋量力義叶獲麟之傳末觀強暴  
罪挂吞鯨之網苟用則德歸藏之繫象可尊奄一作  
奪詰

有司溫柔之薄言斯在况何往不利違禁見嬰宜寘安  
干之責勿容不中之訴則高尚其事甲取類於緇衣下  
人之孽丙乖慕於白賁

是儀書衣判

是儀鶩書衣於市或人告其不仁

主司舉正判

又鞏朔身為主司不舉正之術

對

是儀無首

三國志是儀本姓氏孔融  
嘲儀氏字民無上改為是

族變於句吳鞏朔

司軍績宣於全晉昔聯榮於方冊今異軫於旗亭至於

質彼有無雖歸列肆譏其淫巧必在儲胥詭濫有彰典

刑斯舉書衣創制編冊攸資厠綠篋以相耀雜紫荷而

交映是儀所驚非法貽譏既多謝於緹油徒獲愆於倍

市不任

疑作  
仁

斯露刑故何逃眷彼主司宜從舉正委而

不察事或有由更詰源流兼責名品所犯無謬方可用  
科

旄人奏散判

日本請吏賜宴於朝旄人奏散不以鞞為惠文冠所持  
辭云屬鞞鞞氏

率木脩防判

又柴桑備陽侯脩防率土木丁獨不從曰將俟息壤無  
何是成徒告其祆縣以為瑞科告不伏並仰正斷

對

朔南聲教萬國賓王神靈滋液百珎寶用日本歸獻越  
沙海而西浮陽侯順流泛滄江而東徙衣冠所列是同  
於中外惟蓋其飛有觀於今昔而賜之禮樂飾以隄防  
歌鍾之奏已聞土木之功爰事將使陳茲禁鞞無差絕  
國之音乘彼柴桑有廣通津之備彼而奏發稍一作失  
有常此獨不從寔垂於衆遽彰糾禁幾抗成詞初引罪  
於鞞鞞竟登期於息壤職司之分是則可矜袞妄之疑

未應為允惠文所劾旌人不可寘刑息壤既成縣斷理  
宜稱瑞各從案記庶用平反

登城而指判

甲登城而指乙告其惑衆甲云寔無祇言

專席而坐判

又丁專席而坐庚遂弔之或以為失禮庚不伏

對

禮經爰備喪紀攸設君子行之以立身賢者俯之以合

道理須非禮勿動循不忒之威儀臨而必哀弔有喪以  
匍匐甲也未達自貽登城之罪庚也有儀俄驚失禮之  
謗彼則戾矣此何誤焉且登而不言既異仲宣之賦弔

而未爽無違孔父之經撫事勞於

一作而

三思片言申其

一割但指則為惑

一作惑衆

何必有於袂言弔其有喪寧可

料其失禮向若登而不指乙告即曰誣人坐而不專庚  
弔便為失禮况理則無昧事其可觀自邀惑衆之料未  
闕弔人之禮寘甲之罪斯為得歟論庚之辜頗多失矣

元日懸象判

甲懸政象之法闕下金吾不許曰職在佐天子以平邦  
國決日而歛之

稅千畝竹判

又乙家渭濱有竹千畝京兆府什一稅之辭云非九穀

對

李陽冰

司馬之職懸政一時封君之富比竹千畝高標魏闕事  
昭晰於周官近數渭濱理詳明於漢典所以平邦國之

度通貨殖之宜傳稱百王其禮

一作道

不易著乎三代厥

義難渝方今區宇又寧刑辟不用百工以理庶績其凝  
寶由懸法有孚執古以道寧從變俗之禮以柰守官之  
政斂在決日孰云其非至如什一而取井田遺制九穀  
之外均輸未聞苟脩篁之可率且丹橘其何賦金吾不  
許寶惜大猷乙也有云雅符舊典兩端是扣片言斯折

### 罷役務農判

得戶部議請罷秦中百役專務農計其人可止關東轉



漕長吏云兵滿近郊

一 作 愨

農人未復恐不足支國用

論象肉刑判

又甲與乙俱獻書甲請復象刑云行之已久人必自化  
乙請復肉刑云三代舊法所活甚多大理議俱不中

對

李 紳

四征不庭錢穀是貴百王所切刑法其難將哀輓粟之  
勞同舉赭衣之論顧茲建議惟彼獻書職勞不來既有  
東人之歎惟命難繼永瞻緹縈之感豈擢髮之未宜

一作

允  
何刺一作骨之攸聞澶漫渭川曾莫顧其千畝刻深

秦法且不愧於多端應緣兵未解鞍衣迷襜褕人猶拔

劍法異墨幪計必平均不應瘠魯肥杞今資禁止何必

噬膚刑足况國家儉嗇寡欲好生惡死永懷其禍每捐

無蓋之功尚媿論兵豈命有司之殺職由是舉合量出

入得疑作德用不擾當測淺深減功恤勞既令戎祀能給

揆今酌古必使憲章勿墜三輔長吏不牽復於所司千

代宏綱兼行之於聖日

主司徵筭判

得主司徵筭矣訴未冠

探卵窺隣判

又毋丘三兒登木探卵隣人以窺見室家執縛之

對

岐敬忠

輕徭賦則人安不覆巢則鳳集有司徵筭誠遠符於漢  
主毋丘探卵斯近慕於晉臣癸且有詞實庸人之告訴  
丘為無賴何小子之猖狂若國用耗虛自七歲而宜筭

宅居隣里思一顧而便窺亦何限於冠年須發怒於登  
木况為無事詎藉稅錢之斂既幼而小何處望風之責  
甲宜釋放癸請不徵

文苑英華卷五百五十一